

# Yëkkuö Skà Kit Pablo tö Tesalónica wakpa a, i' ta ide böt

## 2 Tesalonicenses

Mik Pablo bak Corinto etä ie' tö yëkkuö i' kit Jesús mik erblökwakpa tso' Tesalónica e'pa a. I' dör yëkkuö skà kit ie' tö ie'pa a, i' ta ide böt. S'wöbla'ukwakpa wele tö ichè tö Jesús skà dë'röbakne e' kuëki kè s'kawöta kanëblök. Jesús mik erblökwakpa welepa tö e' klöo', e' kuëki ie'pa kè kanëblöia chkè yuloie. E' kuëki Pablo tö Jesucristo skà datskene e' paké ie'pa a.

Pablo éna ie'pa a ichak yësyësè tö Jesús kam döne e' kuëki ie' tö yëkkuö i' kit. Ie' tö ie'pa a iché tö Jesucristo datsketkene e' yökí wëm döraë eköl sulitane kítö'uk. E' kanëblöraë Satanás diché wa. Nies ie' tö ie'pa a iché tö mik Jesús dene etä pè' kos kè erblène ie' mik e' we'ikeraë Skëköl tö.

Erë kam Jesús döne etä ie' mik erblökwakpa kawöta senuk yësyësè ena ie'pa kawöta kanëblök e' kkö'noie. Es Pablo tö ie'pa a iché.

### Shkë'wè

**1** <sup>1</sup>Ye' dör Pablo. Silvano ena Timoteo tso' ye' ta íe. Sa' tso' yëkkuö i' shtök Skëképa Jesús icha erule serke Tesalónica e'pa a. A' batsulewä Skëköl dör S'yé ena Skëképa Jesucristo e'pa mik. <sup>2</sup>As ie'pa er buaë chò ena sene bèrè mù a' a.

### Mik Jesús dene, etä pè' suluë we'ikeraëitö

<sup>3</sup>A yamipa, kekraë sa' kawöta wëstela chök Skëköl a a' dalërmik. A' erblöke Jesús mik, e' kí mir buaë. E' sù a' ñi dalëritsöke, e' kí mir buaë. E' tö sa' ké wëstela chök Skëköl a. <sup>4</sup>Sa' tö a' tté ppékä buaë Skëköl icha eruleë kos e'pa shüa. Eré a' weirke siarë s'bolökpa ulà a, a' töierke siarë Jesús tté kuëki, eré a' e' tkéwä darërëë, a' erblökeia Jesús mik buaë, e' kuëki sa' tö a' kikéka. <sup>5</sup>E' kos wa iwënewä tö Skëköl tö s'shulè yësyësè. Ie' dör se' blü, e' tté kuëki

a' weirke. E' wa iwënewa tö ie' tö ibikeitseke tö a' je' didir ì blúie ie' tso' e' kíie.

<sup>6</sup>Skëköl tö s'shüleke yësyësë këkraë, e' kuekì buaë idir tö wépa tö a' we'ikeke esepa we'ikeraë ie' tö siarë. <sup>7</sup>Ta a' weirke siarë e'pa enuraë sa' ta ñita. E' kos tköraë mik Skëképa Jesús datskene ie' biyöchökwakpa diché ta' taië e'pa ta ena bö'wö ñarke taië e' shua eta. <sup>8</sup>Wépa kè e' batsöta' Skëköl mik, kè wa Skëképa Jesús tté buaë e' iütëne, esepa kos we'ikök ie' datse. <sup>9</sup>Ie'pa weir michoë siarë busdattsa bánet Skëköl diché ta' taië olo ta' taië, e' yöki. <sup>10</sup>E' kos tköraë mik Skëképa Jesús datskene eta. E' kèwö ta ie' icha batse'rupa kos tö ie' kikeraka. Se' erblé ie' mik, esepa kos tö ie' dalöieraë. A' tö ttè yè sa' tö a' a, e' klö'wé e' kuekì a' tso'ñak e'pa shua.

<sup>11</sup>E' kuekì sa' tö Skëköl a' ikieke këkraë a' kì. Sa' tö ikieke ie' a' as ie' tö a' saü tö a' serke yësyësë wes ie' tö a' klö'bak senuk es. Ñies sa' tö ikie ie' a' tö ie' tö a' kimù ì buaë kos kiane wè a' kì e' wà uk buaë ie' diché wa. E' kos wak a' éna a' erblöke Jesús mik e' kuekì. <sup>12</sup>Sa' tö ikieke es as Skëképa Jesús kïkarka a' batamik, ñies as Skëköl tö a' kïkòka buaë. Ie' ena Skëképa Jesucristo e'pa er buaë chò a' a, e' kuekì ie'pa tö a' kïmeraë iwà uk buaë.

### Wëm Sulusi Ichökle

**2** <sup>1</sup>A yamipa, mik Skëképa Jesucristo datskene, eta se' busdaka kashuk a' ñi dapa'uk ie' ta, e' tté pakeke sa' tö a' a' i'ñe. Sa' tö a' a' ikieke kröröë tö <sup>2</sup>yile iché tö Skëképa Jesús datskene, e' kèwö detke, e' ta kè a' e' kütö'uk e' tkiuk ttè ese wa. Isalema yile tö a' a' icheke tö Wiköl Batse'r tö sa' a' ikkaché tö Jesús denetke. Isalema yile tö icheke tö sa' tö ie'pa a' iyé' ö sa' tö ikit yëkkuö kì tö Skëképa Jesús denetke ká i' a. Yile tö iché es, e' ta e' dör kache. <sup>3</sup>Kè a' e' kütö'uk ttè ese wa yës. Skëképa Jesús kam döne e' yöki taië pè' tö Skëköl waterattsa. Ñies wëm sulusi ichökle wömenettsabak weinuk e' döraë. <sup>4</sup>Ì kos tso' dalöië skëkölíe, ese kè kiarpa ie' kì. Ie' wák e' ttsöraka ese kos tsata. Ie' kì ikiane tö sulitane tö ie' è dalöië. Ie' e' tköraka Skëköl wé kibi a' ta ie' chöraë: “ye' dör íyi ulitane kéköl.”

<sup>5</sup>Mik ye' bak a' ska', eta íyi ekké yè'yö a' a, ye' a' ta e' ane a' éna. <sup>6</sup>Ì tö wëm sulusi ñe' wöklö'wekeia as kè idò kam ikéwö dò e' yöki e' jcher a' wa. <sup>7</sup>Erë i'ñe ta Satanás tso'tke iwakanéuk bër akirie as s'ditsö tö Skëköl ttè watöttsa. Erë wëm sulusi ñe' kè dòpa dò mik yi tso' iwöklö'uk e' yënettsa eta. <sup>8</sup>Mik iyënettsa, eta wëm sulusi e' döraë sulitane wörki. Erë mik Skëképa Jesús de, eta ie' e' alöraka iki ilo taië wa ta itterawaitö ikkò siwé è wa. <sup>9</sup>Mik wëm sulusi ñe' de (kam Jesús tö ittòwa e' yöki), eta ie' döraë Satanás batamik. Satanás diché wa, ie' tö ì kè or yi a' ese kos weraë s'kütö'woie. <sup>10</sup>Ì sulu kos wa ie' tö s'wömeulettsa weinuk aishkuö ta esepa kütö'weraë. Ie'pa kè wa Jesús tté mokì e' dalëritse e' tsatkoie, e' kuekì

ie'pa wömeulettsa weinuk. <sup>11</sup>E' kuëki Skëköl tö ie'pa wömerattsa as ie'pa e' kítö'ù Wëm Suluë Ichökle e' kache wa. <sup>12</sup>Es ie'pa kè tö ttè mokië ñe' klö'wè. E' skéie ie'pa ttsè'r buaè ì sulu wamblök, e' kuëki Skëköl tö ie'pa wömerattsa weinuk aishkuö ta. Esepa kos kî inuî dôraë.

### S'yé tö se' shukitbak tsatkè

<sup>13</sup>Erë, a yamipa, a' dalër taië Skëképa Jesús éna. Tsawe ta Skëköl tö a' shukitbak tsatkè iWiköl tö a' batse'wè e' batamik. Ñies a' tsatkène ttè mokië klö'wé a' tö e' batamik. E' kos kuëki sa' kawöta wéstela chök Skëköl a këkraë a' kî. <sup>14</sup>Sa' tö Jesús tté buaë paka' a' a, e' wa Skëköl tö a' klöo'bak as a' ser michoë Skëképa Jesucristo ta ñita e' olo taië e' a.

<sup>15</sup>A yamipa, e' kuëki, ttè wa sa' tö a' yö' mik sa' bak a' shua eta, ñies mik sa' tö yëkkuö kit a' a eta, ttè e' kos bló buaë a' er a, kè ilo'yar. <sup>16</sup>Skëképa Jesucristo ena Skëköl dör S'yé, e'pa éna se' dalër taië. Ie'pa er buaè chë se' a, e' tö se' er pablè michoë. Nies ie'pa kablè sene michoë muk se' a, e' panuk kröröë se' tso'ie. <sup>17</sup>As ie'pa tö a' er pablö. As ie'pa tö a' er diché kí iö as a' tö ì buaë kos ù ttè wa ena iwawatke.

### S'yé a ikió sa' kî

**3** <sup>1</sup>A yamipa, bata ekkè ta, a' tö Skëköl a ikió sa' kî as Skëképa Jesús tté pakeke sa' tö, e' kí pakar bet ká ulitane wakpa a ta e'pa tö iklö'wé wës a' tö iklöo' es. <sup>2</sup>Ñies pè' tso' taië kè erblöku' Jesús mik, e' kuëki a' ikió Skëköl a tö ie' tö sa' tsatkó pè' sulusi yöki. <sup>3</sup>Erë Skëképa Jesús ttö mokië, ie' tö a' se'weraë tkëulewä darërë ie' mik ta a' tsatkeraëitö ì sulu yöki. <sup>4</sup>Sa' e' mué ie' mik tö ie' tö a' kïmeraë. E' kuëki sa' wä ijcher tö ì uk a' ké sa' tö, e' wawé a' tö ta a' iwè michoë. <sup>5</sup>As Skëképa tö a' kïmù kos Skëköl éna se' dalër e' wà anuk. Nies as a' kïmuitö a' weirke kos e' dalè'ttsök wës Cristo tö ie' icha dalè'ttsé' es.

### Se' kawöta kanëblök

<sup>6</sup>A yamipa, Skëképa Jesucristo ttö wa sa' tö a' a icheke tö s'yamipa welepa bikërke, esepa yöki a' e' skó. Wépa kè tö ttè me'at sa' tö e' iuteku', esepa yöki a' e' skó, kè iutar. <sup>7</sup>A' wä ijcher buaë tö a' kawöta senuk wës sa' bak senuk a' ska' es. A' kè wä sa' sune bikënik. <sup>8</sup>Sa' kè wä yi chkè ñane kè patoule. E' skéie sa' bak kanëblök darërë ñië ñañë shtrine wa ì wa chkoie, di' yoie as sa' kè tö yi tsiriü e' tiè wa e' kanewè wa. <sup>9</sup>Mik sa' bak a' ska' warma a' kawöta sa' sauk, sa' kkö'nuk, erë sa' kè wä ì kine a' a es. Es sa' kanëblé' a' ska' as a' wöblar kanëblök wës sa' tö a' a iwä kkayé' es. <sup>10</sup>Mik sa' bak a' ska', eta ttè i' yé' sa' tö a' a: “Yi kè kanëblak, ese kè tiar.” <sup>11</sup>Sa' tö ittsé tö a' welepa bikërke taië. Ie'pa kè kanëblöku' yës, e' skéie wépa kanëblöke esepa tsiriwëkerakitö ñië. <sup>12</sup>Pè' esepa patté sa' tö, ñies ie'pa ké sa' tö Skëképa Jesucristo ttö wa kanëblök darërë bèrë e' kanéwoie.

<sup>13</sup>Erë, a yamipa, kè a' shtrinuk ì buaë uk kékraë. <sup>14</sup>Ttè shtéyö yëkkuö i' k<sub>i</sub>, e' kè iutè yile tö, e' tã ichó a' malepa a. Ie' yöki a' e' skó as ijaërka tã ier mane'üne. <sup>15</sup>Erë kè ie' suar suluë wës s'bolök es, e' skéie ipattó er bua' wa wës s'ël es.

**Pablo e' chéat**

<sup>16</sup>Skékëpa Jesús dör sene bèrë mukwak, as e' tö sene bèrë mù a' a kékraë ì kôs tköke a' tã e' shua. As ie' tkërie a' ulitane tã kékraë.

<sup>17</sup>Ye' dör Pablo, e' tö shkëne i' shté ye' wák ulà wa wës ye' tö ishteke yëkkuö kôs shtéyö ese k<sub>i</sub> es. Es sulitane wã ijcher tö ye' wák tö ishtë. <sup>18</sup>As Skékëpa Jesucristo er buaë chò a' ulitane a taië.